

Na osnovu člana 16. stav 1. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10) i člana 83. stav (1) tačka a) Zakona o unutrašnjim poslovima Zeničko-dobojskog kantona („Službene novine Zeničko-dobojskog kantona“, broj: 13/18, 6/19 i 22/19), na prijedlog Ministarstva unutrašnjih poslova, Vlada Zeničko-dobojskog kantona, na 37. sjednici, održanoj dana 27.12.2019. godine, d o n o s i

UREDBU
o osiguranju ličnosti i objekata Zeničko-dobojskog kantona
koji se posebno osiguravaju

DIO PRVI - LIČNOSTI I OBJEKTI KOJI SE POSEBNO OSIGURAVAJU

Član 1.
(Predmet Uredbe)

Ovom uredbom određuju se ličnosti i objekti Zeničko-dobojskog kantona (u daljem tekstu: Kanton), koji se posebno osiguravaju, uređuje način njihovog osiguranja kao i druga pitanja od značaja za osiguranje ličnosti i objekata.

Član 2.
(Ličnosti koje se posebno osiguravaju)

Ličnosti Kantona koje se posebno osiguravaju su: predsjedavajući Skupštine Kantona, premijer Kantona, izabrani i imenovani zvaničnici i drugi imenovani kantonalni dužnosnici, ukoliko se procijeni potreba za njihovim osiguranjem.

Član 3.
(Objekti koji se posebno osiguravaju)

Objekti u Kantonu koji se posebno osiguravaju su: Skupština Kantona (u daljem tekstu: Skupština), Vlada Kantona (u daljem tekstu: Vlada) i drugi objekti po zahtjevu Vlade Kantona.

Član 4.
(Ostale ličnosti koje se osiguravaju)

(1) Izuzetno, kada sigurnosne okolnosti to zahtjevaju, policijski komesar uz konsultaciju ministra Ministarstva unutrašnjih poslova Zeničko-dobojskog kantona (u daljem tekstu: Ministarstvo), na zahtjev nadležnih institucija, može odrediti da se određeno vrijeme osiguravaju i druge ličnosti i objekti na kantonalnom i općinskom odnosno gradskom nivou.

(2) Mjere osiguranja ličnosti i objekata iz stava (1) ovog člana, mogu se u početnom stadiju odrediti do 30 dana i iste će se produžiti pod uslovom da nisu prestali sigurnosni razlozi koji su doveli do njihovog određivanja.

DIO DRUGI - ORGAN KOJI VRŠI OSIGURANJE I NAČIN OSIGURANJA
LIČNOSTI I OBJEKATA

Član 5.
(Organ koji vrši osiguranje)

Poslove posebnog osiguranja ličnosti i objekata iz člana 2. 3. i 4. ove uredbe vrši Uprava policije Ministarstva unutrašnjih poslova Zeničko-dobojskog kantona (u daljem tekstu: Uprava policije) na zahtjev premijera, odnosno predsjedavajućeg Skupštine Kantona, uz konsultaciju ministra Ministarstva.

Član 6.

(Način osiguranja ličnosti)

(1) Osiguranje ličnosti iz člana 2. i 4. ove uredbe podrazumjeva osiguranje objekta u mjestu stanovanja i to putem patrolne djelatnosti povremenim obilaskom tokom 24 sata.

(2) Osiguranje ličnosti može se vršiti u formi redovnog pojačanog osiguranja u mjestu stanovanja, na radnom mjestu i u pokretu, kada to sigurnosni razlozi zahtjevaju.

Član 7.

(Način osiguranja objekata)

Osiguranje objekata iz člana 3. ove uredbe vrši se neposrednim fizičkim prisustvom potrebnog broja policijskih službenika i kroz pojačanu patrolnu djelatnost tokom 24 sata.

DIO TREĆI - PLAN I MJERE OSIGURANJA

Član 8.

(Plan osiguranja)

(1) Konkretna mjera i aktivnosti oko organizovanja i načina sprovođenja osiguranja ličnosti i objekata, te mjere, radnje, potreban broj policijskih službenika i sredstava, utvrđuju se posebnim Planom osiguranja, kojeg donosi policijski komesar, uz konsultaciju ministra Ministarstva.

(2) O načinu osiguranja i sačinjavanju posebnog Plana osiguranja konsultovat će se i osiguravana ličnost.

Član 9.

(Poštivanje mjera osiguranja)

(1) Ličnosti koje se posebno osiguravaju dužne su poštovati i pridržavati se predviđenih mjera i načina osiguranja.

(2) U slučaju nepridržavanja predviđenih mjera i načina osiguranja, štićena ličnost je obavezna o razlozima nepoštivanja i/ili nepridržavanja predviđenih mjera i načina osiguranja pismeno ili usmeno obavijestiti Vladu Kantona, Ministarstvo i Upravu policije, čime štićena ličnost preuzima odgovornost za ličnu sigurnost.

Član 10.

(Pomoć policije u saobraćaju)

Policijski službenici, prilikom obavljanja svojih redovnih poslova, dužni su poslanicima Skupštine Kantona i članovima Vlade Kantona, u toku obavljanja njihovih poslova i zadataka za vrijeme trajanja mandata, pružiti potrebnu pomoć u saobraćaju i na drugim mjestima gdje se za to ukaže potreba.

Član 11.

(Osiguranje delegacija i ličnosti)

Uprava policije može, kada to interesi sigurnosti zahtjevaju, izvršiti osiguranje delegacija i ličnosti koje borave u posjeti Kantonu po pozivu državnih, federalnih i kantonalnih organa vlasti.

DIO ČETVRTI - FINANSIJSKA SREDSTVA I STUPANJE NA SNAGU

Član 12.

(Finansijska sredstva)

Sredstva za rad potrebna za osiguranje ličnosti i objekata koji se obezbjeđuju u Kantonu osiguravaju se iz Budžeta Kantona.

Član 13.
(Ravnopravnost spolova)

Gramatička terminologija Pravilnika podrazumjeva ravnopravno uključivanje oba spola.

Član 14.
(Stupanje na snagu)

Ova uredba stupa na snagu osmog dana od dana objavljivanja u „Službenim novinama Zeničko-dobojskog kantona“.

PREMIJER

Mirza Ganić

Broj: 02-14-18775/19

Datum, 27.12.2019. godine

Z e n i c a

DOSTAVLJENO:

1x Ministarstvo unutrašnjih poslova,

1x „Službene novine Zeničko-dobojskog kantona“,

1x a/a.